

Kontuola

ANTZUOLA / Egubakoitza / 2003ko ekainaren 20a / 162. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02


EAJ-EAko bost zinegotzik bakarrik hartu zituzten karguak zapatuko bilkuran

AINZANE IRIZAR

Gainerako herrietan moduan, aurreko zapatuan, 12:00etan, udalbatza osatzeko osoko bilkura berezia egin zuten Antzuolako udaletxean. EAJ-EAko hiru kargu hautatuak ez zuten kargua hartu. Gertu Gae plataformako hiru kidek hartu zuten parte osoko bilkuran.

Udalbatzako mahaian aurpegi berri asko ikusi genituen zapatuan: besteak beste, PSE-EEko Elvira Kortajarenarena eta EAJ-EAko hainbat zinegotzirenak. Azken horiei dagokienez, koalizioak hauteskundeetako emaitza ofizialen arabera zortzi zinegotzi lortu zituen arren, bostek baino ez zuten kargua hartu. Zerrendako seigarren, zazpigarren eta zortzigarren kargu hautatuak ez ziren osoko bilkuran egon, eta, hortaz, ez zituzten euren karguak hartu.

EAJ-EA koalizioak, baina, ez du oraindik inolako azalpenik eman. Jakinarazi digutenaren arabera, datozen egunotan azalduko dituzte herritarren aurrean erabaki horren arrazoiak zeintzuk izan diren.



Plataformako hiru kidek, EAJ-EA koalizioko bostek eta PSE-EEko batek hartu zuten parte osoko bilkuran.

GERTU GAE OSOKO BILKURAN

Gertu Gae plataformari hauteskundeetan parte hartzen laga izan baldio, hiru zinegotzi izango lituzke orain. Horregatik, zerren-

dako lehendabiziko hirurak osoko bilkuran egon ziren; hain zuzen ere, orain arte alkate izan den Mireia Unamuno, Juan Antonio Iturbe eta Patxi Olabarria. Esan

bezala, EAJ-EA koalizioko seigarren, zazpigarren eta zortzigarren kargu hautatuak kargua hartzera joan ez zirenez, plataformako kideek eserlekuak hartu zituzten

Jose Angel Zabalok bost boto lortu zituen, eta hura izendatu zuten alkate

eta hantxe egon ziren osoko bilkura iraun zuen bitartean.

Kargu hartzeak bukatu ostean, berriz, alkatea aukeratzeko bozketari ekin zioten. Bost boto lortu zituen Jose Angel Zabalok, eta hura izango dugu, hortaz, alkate berria.

Kargua hartu ondoren, hiru batzuk izan zituen Zabalok herritarrendako: alde batetik, koalizioan eta berarengan konfiantza izan duten herritar guztiei esker, besteak, hauteskunde garaian behin eta berriz adierazi duen moduan, lan egiteko gogoz. Udalera doazen guztiendako ateak zabalik dituela gogoratu zuten. Bukatzeko, elkarrizketaren alde azaldu zen Zabalok, eta hurrengo bilkura bitartean gainerako alderdiekin bertan egongo duela adierazi zuten.

JAIK

Ondarreko jaiak eta San Juanak ospatuko dituzte aste bukaeran

Hamar urteren ostean, aurreko berriro antolatuta dituzte Gorpuzti jaiak Ondarren. Bihar, zapatua, hasiko dituzte ekitaldiak: 12:00etan, gimkana jokoak egongo dira, Peña Aiastuik antolatuta; 16:00etan, umeendako jolasak egongo dira; eta 18:00etan, berriz, krosa, hura ere umeendako.

20:30ean, auzokoei afaria egingo dute eta afalostean dantzarako aukera egongo da trikitilariekin; 22:00etan, bideo emanaldia egingo dute Ondarreko plazan, eta garai bateko Antzuola

la ikusteko aukera izango dugu.

Domekan, berriz, Gorpuzti Eguna ospatuko dute: 12:30ean, mezaren ondoren, prozesioa egingo dute elizatik Ondarreko plazara. Hantxe aldare bat jarriko dute, lorez apainduta, eta loreak bedeinkatuko ditu abadeak.

Prozesioa da, hain zuzen ere, hamar urteotan egin duten ekitaldi bakarra; nahiz eta jairik ospatu ez, urtero egin izan dute.

13:00etan, berriz, herriko dantzarien saioa izango dugu Ondarreko plazan bertan.

SAN JUANAK

Domekan, hilaren 22an, San Juanak ospatuko dituzte Uzarragan. Goizeko hamarretan meza egongo da, eta gero, dantza saioa izango dugu Uzarragako plazan.

San Juan bezperan, berriz, ekainaren 23an, herrian bertan ospatuko dute jaiak. Iluntzean, 20:30ean, hain justu, arbola jasoko dute Herriko Plazan, eta gero, Oinarin taldeko dantzarien saioa izango dugu. Gero, balkoi eta leihotako lore lehiaketako sariak banatuko dituzte.



Astehenean, San Juan bezperan, jasoko dute arbola Herriko Plazan.


GAZTETXEA

Gazte Asanbladako kideek aurrera segitzen dute gaztetxeko egokitzapen lanekin

Aste Santu aurretik jaso zituzten Gazte Asanbladako kideek gaztetxea izango den lokaleko giltzak. Berehala hasi zituzten egokitzapen lanak, baina oraindik lan handia dago egiteko. Jaietarako zabaldu nahi dute herriko gaztetxea, baina ez da erraza izango.

Lokalean zeuden hormak bota egin dituzte, lokala pintatu egin dute... Lan handia egin dute Aste Santu aurretik giltzak jaso zituztenetik hona, baina oraindik ez dute geratzen zaie. Lan hori guztia egiteko gazte talde handia elkartu du Gazte Asanbladak, eta hala azaldu digute: "Herriko gazteek oso ondo erantzun dute; adin guztietako gazte asko ibili gara lanean azkeneko hilabeteotan".

Besteak beste, lokalaren fatxada txukuntzea eta lokalaren barruan ke-erazgailua jartzea geratzen zaie, baina lan horiek ez dituzte gazteek eurek egingo, gremioak kontratatuko dituzte. Horretarako, 6.000 euro inguru eman die Antzuolako Udalak.



Herriko gazte askok dihardute gaztetxea egokitzeko lanetan.

GAZTETXEA, ZELAKOA?

Asanblada bitartez funtzionatzen dute gazteok, eta halaxe hartzen dituzte erabaki guztiak. Gaztetxeak zelan funtzionatuko duen

ere erabaki beharko du asanblada horrek, baina oraindik ez dute horren gaineko erabakirik hartu. Ildo horretatik, taberna jarri edo ez eztabaidatzen dihardute-

la azaldu esan Gazte Asanbladako kideek. Hasiara baten, edari eta janari makinak jarriko dituzte lokalean; denborarekin, eta gaia ondo aztertu eta eztabaidatu ondoren hartuko dituzte bestelako erabakiak.

Funtzionamenduari dagokionez, argi daukatena da gazteek eurek kudeatuko dutela gaztetxea. Dena dela, Udalarekin klausula bat sinatu zuten orain dela gutxi; hainbat baldintza onartu zituzten klausula horren bitartez. Zera adierazi digute horren gainean: "Barne funtzionamendua gure esku laga dezatela eskatzen dugu; gure jarduerak kanpoan eragina badute, jakina, onartzen dugu Udalak esku hartzea".

JAIETARAKO EGITARAUA

Gazte Asanbladako kideen nahia da jaietarako zabaltea gaztetxea, baina, esan bezala, lan handia dago egiteko, eta ikusi egin behar posible den edo ez. Dena dela, egitarau zabal prestatzen dihardute herriko jaietara begira: herri kirolak, kontzertuak eta txekorrak egongo dira, besteak beste, Gazte Asanbladak antolatuta.

LABUR

'Biblioporrak', udan irakurtzeko hainbat gomendio

Antzuolako Udal Liburutegiak, ibarreko gainerako liburutegiekin batera, *Biblioporrak* izeneko eskuorri bat argitaratu du. Udan irakurtzeko hainbat liburu gomendatzen ditu. Eta adin tarte guztiak kontuan hartuta, umeendako, gaztetxoendako eta helduendako 70 liburutik gora gomendatzen dituzte eskuorri horretan. Helburua da udako oporretan ere irakurtzeko zaletasuna bultzatzea. Eskuorri horiek etxe etxe banatuko dituzte; Herri Ikastetxean, anbulatorioan, udaletxean eta liburutegian bertan ere egongo dira eskuragarri.

Udaletxeak eta liburutegiak ordutegi berria

Urtero moduan, ordutegia aldatu dute udaletxeak eta liburutegiak. Udaletxearen kasuan, astelehenetik egubakoitzera egongo da zabalik, 08:00etatik 15:00etara. Ordutegi hori izango du irailera arte, iraila barne.

Liburutegiak ere beste ordutegi bat izango du gaurtik, egubakoitza, irailaren 15era arte. Goizez egongo da zabalik, 11:00etatik 14:00etara, hain zuzen ere. Abuztuan, berriz, itxita egongo da.

Sinadurak bilduko dituzte herriko erretiratuek

Toledoko hitzarmena berri-tuko dutela eta, euren eskarek eragina izan ditzaten, sinadurak batuko dituzte erretiratuek. Euren pentsioengan eragina du hitzarmen horrek. Ekainaren 23an, 24an eta 25ean egongo dira sinadurak batzen erretiratuen elkartean, 18:00etatik 19:00etara. Gogoratu ezazue nortasun agiria eraman behar duzuela, zenbakia beharrezkoa da eta.

Dantzariz bete ziren kaleak

Ia 200 ume eta nagusik hartu zuten parte aurreko domekan Ume Dantzarien Egunean. Umeak, dantzak eta sargoria izan ziren eguneko protagonista nagusiak. Aurreko egunetan moduan, izugarriko beroa egin zuen domekan, eta parte hartu zuten umeek nahiko lan izan zuten; eguerdian ume bat baino gehiago jarri zen ondoezik beroagatik.

Hala eta guztiz ere, jende askok hartu zuen parte aurreko domekako ospakizunetan./A.I.



Zabalo Iturgintza S.L.
Bidea eginez

Tailerra: Uzarraga bidea, 10, Antzuola. Tf. 943 78 71 78
Erakusketa: Kalebarren, 1, Antzuola. Tf. 943 78 71 79, Tf. eta F. 943 76 64 73

- Gasa
- Berogailuak
- Haire egokitua
- Enpresen mantenimendua
- Lurrin instalazioak
- Bero-urreztea
- Bainugelak. Proiektuak momentuan DIBaren bidez
- Birgaitze-espeditentak bideratzen ditugu

EGAÑA

Era guztietako arotz lanak

Tarima eta parketa jartzea
Zoruen kutxilatua eta barnizatuak

Kalegoi 21, ANTZUOLA Tel.: 943 76 64 23